


Fabrika Ai-oan Mutin iha Carabela



Kompania husi Australia iha ona planu atu halo fabrika foun iha Carabela. Fabrika atu hasai mina husi Ai-oan Mutin nia musan. Kompania atu hetan ai musan sira ne'e husi rai liur no mos oituan husi Timor-Leste. Planu ba fabrika ne'e bo'ot duni! Nia atu uza rai 59+ hektares (hanesan kampu tebe bola dala 120).

Ai-oan Mutin ema labele han ka hemu maibe mina Ai-oan Mutin bele uza iha kareta. Bele uza mos iha fugaun, maibe presiza fugaun espesial ne'ebé Timor-Leste seidak iha.



Kompania hein katak ema hakarak uza mina Ai-oan Mutin iha kareta tanba mina sira seluk halo fo'er maka'as. Nia se exporta mina Ai-oan Mutin ba liur. Ema Timor mos iha oportunidade atu sosa mina Ai-oan Mutin. Mina Ai-oan Mutin karun liu duke solar. Kompania nia naran Enviroenergy Developments Australia (EDA). EDA mai Timor-Leste uluk iha 2005. Iha Feveireiru 2008 nia halo kontraktu ho Sekretáriu Estadu Pólitika Enerjética kona ba fabrika.

EDA iha planu atu uza rai "Area Zona Industria Carabela", pontekais no rai fabrika cemente tuan. Kontraktu fo lisensa ba EDA atu sosa rai privadu iha area zona industria iha Carabela. Iha konstitusaun Timor-Leste kompania estranjeiru laiha direitu atu sosa rai iha Timor, ne'e ilegal. (Maski, ema estranjeiru ruma hetan dalan legal atu mai rai nain hamutuk kolega sira Timor-nian, maibe prosesu susar liu ba sira).



Se iha problema entre rai nain no EDA, governu deside nia rasik responsabiliza atu rezolve disputa. Maibe governo iha kontraktu ho EDA, nia la independente. Iha situasaun barak los, governo labele obriga ema atu fa'an ka fo aluga sira nia rai privadu ba kompania.

Fabrika bo'ot loos bele halo fo'er maka'as ne'ebé naran polusaun. Fo'er iha mota, tasi, anin ka rai bele halo impaktu maka'as ba ema, animal, ikan no rai.


Iha rai seluk iha sistema atu kontrola polusaun. Timor-Leste seiduak iha sistema ne'e. Tenke halo molok halo fabrika.

Fabrika Ai-oan Mutin uza kimia perigu no be'e manas. Presiza kuidadu nune'e accidente la mosu. Presiza ema la'os husi kompania atu tau matan ba fabrika bebeik. Uluk liu, sira presiza haree planu ba fabrika ne'e no oinsa bele hamenus ninia impaktu ba ema, rai no animal.



EDA no Governu promete katak projektu ne'e sei fo serbisu ba ema barak.

Realidade:



Halo fabrika kria serbisu, Maibe la'os serbisu permanente.

Hafoin halo tiha fabrika, la kria serbisu barak.

Ema atu serbisu iha fabrika prezisa experiencia no mos treinamentu.

EDA la iha obrigasaun atu uza trabalhadores husi Carabela. Kompania bele hatama ema husi rai liur.

Iha 2005 EDA hateten katak sira atu kria serbisu ba ema 20.000 atu kuda Ai-oan Mutin. Povu iha Baucau no Viqueque kuda ona Ai-oan Mutin iha tinan haat nia laran. EDA seidak hola Ai-oan Mutin ne'e no to'os nain seidak simu osan. Mos folin ne'ebé sira oferese uluk barato lo'os.



Kompania EDA halo promesa barak kona ba bu'at ne'ebé di'ak husi fabrika ne'e ba ema Timor.

Dala ruma kompania estranjeiru fo buat ida di'ak ba komunidadade se sira hanoin komunidadade la suporta tanba la halo bu'at di'ak ba sira. Por ejemplu, karik sira loke klínika maibe polusaun maka'as halo ema moras maka'as. Dala barak kompania estranjeiru nunka halo tuir sira nia promesa.

Seidauk klaro se EDA bele realiza ninia planu ba fabrika. Maibe di'ak ba komunidadade atu hanoin kona ba prosesu ne'e no mos deside ninia hanoin rasik kona ba fabrika.

Saida mak Organizasaun La'ó Hamutuk?



Maxi, Ines no Shona serbisu ho organisasaun Timor nian *La'ó Hamutuk*.

La'ó Hamutuk koko atu fasilita prosesu ne'ebé respeita ema Timor nia hakarak iha dezenvolvimentu ba sira nia rain rasik, no fahe informasaun klaru kona ba prosesu ne'e.

Ami nia numeru kontaktu 723 4330 no 332 5013.

Mos bele vizita *La'ó Hamutuk* iha Dili iha Farol,
iha Asosiasaun HAK nia sorin.

Perguntas ba diskusaun

- ✓ Fabrika bele lori di'ak saida ba komunidadade?
- ✓ Saida mak sai risku husi fabrika ne'e ba komunidadade?
- ✓ Saida mak ita nia mehi ba komunidadade Carabela ba oin?
- ✓ Oinsa fabrika konkorda ho mehi ka la konkorda?
- ✓ Se fabrika atu la'o, saida mak prosesu ne'ebé bele hamenus asuntu sira no respeita komunidadade?
- ✓ Iha dalan ba oin komunidadade bele tuir atu hato'o ninia hakarak iha prosesu ne'e ka lae?